

REGIONAL NEWS

HEADLINES:-

1. Dampa Assembly bial bye-election-a thlan tlin Dr. R. Lalthangliana chu naktip Thawhlehi hian MLA atan lakluh a ni dawn.
2. Lawngtlai district bawrh sap Pu Donny Lalruatsanga'n district chhunga tuihri leng mek avangin mi 6 thi tawh mah se tunah chuan hrileng dinhmun a zia-awm tih a sawi.
3. Mizorama awm mek Myanmar raltlante mit-naute leh kutze-thla lak hna kal zelah raltlan awm zawng zawng zahve aia tam chhinchhiah an ni tawh.
4. Bihar-ah NDA kaihhruai sorkar din turin NDA-a tel party hrang hrangte, ngawrh takin an thukhawm chho mek .

<><><>

MLA OATH-TAKING

Dampa Assembly bial bye-election-a thlan tlin Dr. R. Lalthangliana chu naktip Thawhlehi hian MLA atan lakluh a ni dawn.

Dampa Bialtu MLA Pu Lalrintluanga Sailo, kumin July ni 21-a a thih avanga Dampa biala tun thla ni 11- a by-election inthlan vote thlakah khan MNF candidate Dr. R. Lalthangliana chu thlan tlin a ni a. Mizoram legislative assembly member atan November ni 18, Thawhlehi, chawhma dar 11:00 ah Assembly Conference Hall, Annexe Building-ah Assembly Speaker Pu Lalbiakzama'n rinawmna thuthiam tirin MLA atan a la lut ang.

Dr R. Lalthangliana hian kum 1986-ah MNF Party zawmin party chhungah nihna hrang hrang a chelh tawh a, tunah hian Sr. Vice President a ni mek ani,tum ruk MLA ni tawhin Lunglei North bialah a zawnin vawi 5 MLA thlan tlin a ni a, South Tuipui (Hnahthial) bialah vawi khat tlingin Mizoram MLA zingah chatlak awm lova mahni biala tling rei thei ber a ni. Term 6 MLA a nih lai hian Cabinet Minister term thum a chelh a, hengah hian Department hrang hrang a enkawl a,tunah hian Dampa bialah thlan tlin leh niin hei hi MLA, vawi 7 a nihna tur a ni dawn a ni.

<><><>

MCC VIOLATION

Dampa bial bye-election atana vote zawn vanglaia chief minister Pu Lalduhoma inthlan dan (election model code of conduct) bawhchhia a puhna hnuhnung zawk chu Election Commission of India in a bawhzui zel.

Chief Electoral Officer (CEO) pisa atanga thudawn danin Election Commission of India (ECI) hian CEO lamin an ngaih dan an theluh chu a Chiang tawh lova an ngaih thu an rawn hriattir a. Silsury khua a chief minister thusawi - Hruaitu hmasate'n Mizo mipuite leh Chakma inkarah inhuatna chi an lo tuh a, hruaitu hmasaten Chakma huat dan min lo zirtir tawh thin a ni, ti a sawi ni a, MNF legal board-in an puhna chu ECI hian a ngaimawh hle ni a thu dawn a ni a. Chutih rualin CEO pisa lam sawifiahna hi Chiang tawh lova ngai-in a rawn zawt Chiang leh mek a, a thusawi ngai ngai ziah chhuah (transcript) thelut turin CEO pisa hi a rawn hriattir bakah Pu Lalduhoma thusawi khan MCC bawhchhiatna

emaw Representation of People Act.1951-in a khap, chi leh chi inkara inhuatna thlen thei lam hawi a ni em tih chungchangah emaw CEO pisa ngaihda fel fek fawk ECI chuan a hre duh baw a, zawhna eng engemaw an la rawn zawt zui reng a ni.

Puan tawh angin MNF vekin MCC bawhchhia a chief minister an puhna hmasa zawkah khan ECI chuan rorellai ZPM chu a rawn kamkhat tawh a. Dampa bye-election inthlan campaign lai a cheng vaibelchhe 770 senga tuikhuah tum a nih thu Pu Lalduhoma'n a sawi sawifiahna chu pawm lovin ZPM president chu an star campaigner-te reng reng an thusawi kawnga fimkhur turin a hriattir baw a ni.

<><><>

LIVING MUSEUM

Art and Culture Department buatsaih Mizo Typical Village, Zokhua, Falkawn a awm chu mipuiten an hlut in, tlawhtu an thahnem thei hle.

Art and Culture Department Director Pi Carol VLMS Dawngkimi chuan, hmanlai pi leh pute khawsak dan leh nunphung, a tak ngeia thangtharten an hmuh a an tem chin theih nan te, zirlai naupangte tana tangkai tur leh an zirlaibu a awmte an hriatthiam lehzual theih nan te, zin mite'n Mizo kutchhuak an hmuha an lei theih nan bakah tualchhung mite leh thailaite tana sum lakluhna hnar a nih theih nan Living Museum chu buatsaih a nih thu a sawi a. Hei bakah hian khualzinte'n mizo hnam nun an hmuhfiah theihna tura buatsaih Live Museum chu Inrinni apianga neih thin a nih thu sawiin, cheng 100 chawiin Mizo nun dan chi hrang hrang Live Demonstration in pek thin a ni ,ati a, hnam lam leh zai hmanga intih hlimna te entir thin a ni thu a sawi baw.

<><><>

GASTROENTERITIS

Lawngtlai district bawrhsap Pu Donny Lalruatsanga chuan Kakichhuah leh Hruitezawl a tuihri leng mek avangin mi 6 thi tawh mah se tunah chuan hrileng dinhmun a zia-awm tawh a ti a, he hri leng avang hian mi 9 an thi tawh ani.

Akashvani News zawhna chhangin Lawngtlai bawrhsap chuan wawiina Kakichhuah an tlawhna-ah kawthalo 4 chauh an awm tawh thu leh hrileng dinhmun a zia-awm tawh thu a sawi a. Lawngtlai CMO pisa atangin medical team-in an thutchilh reng bakah World Health Organisation (WHO) leh Doctors without Borders mithiamte'n an awm chilh baw thu a sawi. Kawthalo hri kai damlote sample leh an khaw tuikhur tui endik tur Zoram Medical College & Hospital laboratory a an thawh chu a la chhuak lo chungin natna hlauhawm lutuk ni lova mithiamte'n an ngaih thu leh enkawl hma chuan natna dam hma taka ngaih a nih thu a sawi a. Nunna chante hi raltlan 3 leh khaw tual mi 3 an nih thu a sawi baw a ni.

He tih lai hian Siaha district-a Lodaw leh Lomasu khua-ah pawh tuihri ni a hriat kawthalo natna a leng a, mi 3-in an thihpui tawh a, he hri leng avanga Siaha leh Lawngtlai district a thi zat chu an vaiin 9 an tling tawh ani. Lawngtlai leh Siaha a tuihri ni a rinhlelh leng hi Chin state chhimlam Myanmar ram chung Paletwa bial a mi 300 chuangin an vei baw avangin Mizoram chung amite hi an rawn kai chhawng ni a rin a ni a. Hemi avang hian district bawhsap pahnihte chuan Myanmar ramri khar rih turin thupek an chhuah a ni.

<><><>

MUSIC FESTIVAL

Ningani atanga tan Lunglei Kawmzawl-a Rimawi Kutpui 'Leitlangpui Music Festival' 2025 chu nizan khan zawh fel a ni.

Music Festival tawp zanah hian Tourism Minister Pu Lalnghinglova Hmar chuan Leitlangpui a chul dawn lo tih mai an duh tawh loh thu leh Leitlangpui a vul zel dawn tih an duh thu sawiin, nikum lamah hlawhtling taka Leitlangpui Music Festival bul tan a nih hnuah, kuminah a aia ropui zawka buatsaihin, nakkumah ropui lehzualin buatsaih zel tum a ni, a ti a. Lunglei chu Mizoram rimawia sul sutu, Serkawn Concert lo chhuahna a nih angin Leitlangpui Music Festival pawh a par vul zel dawn a ni, a ti.

Tourism Minister chuan Mizo leh Mizo inlawm a, Mizo hla saa zai thup thup te, Mizo hla, zaithiam leh rimawi tum thiam ngaihsan te hi rimawi kutpui tihlawhtlingtu a nitih sawiin, Mizoram Tourism-in thang zel tura a mamawh te ani ati a, Mizoram hmun tina mite chu intlawn tawn sup sup a, hunpui leh hun bil buatsaih a, chumi kal tlang chuan tualchhung mite ipite-ah sum a luh a, ram eibar dinhmun (economy) chawi kan a nih chu Tourism-in a tum a nih thu sawiin, event tha, khualzin hip thei buatsaih zel tum a nih thu a sawi.

Minister chuan Leitlangpui Music Festival chu a tiak dawn a, tourism erawh a tiak dawn lo tiin, Aizawlah December ni 15-23 chhungin Thlasik Kut (Winter Festival) buatsaih tum a nih thu te, Krismas lam hawi a hun duan a, Krismas carol leh Krismas costume parade te buatsaih tum a nih thu te a sawi a. December ni 31-ah a huhovin Mizo thalaite tan Sakawrhmutuai Sunset programme buatsaih a, kum hlui ni tla thlir liam tum a nih thu a sawi a. Mizoramah kum hlui thlaha tourist hip thei turin ruahmanna siam a ni tiin, Mizorama khualzin tam zawk hip luh an nih theih nan Mizo thil ngaisang a, lawm a, chawi lar zel turin thalaite a chah. Leitlangpui Music Festival 2025 tawp ni-ah hian chhun lamah stall hrang hrangte mipui tlawh theih leh dawr theiha hawn a nih bakah, Janjatiya Gaurav Diwas 2025 pualin Lunglei Bawrhsap Pisa chuan hriselna endikna (health screening) an buatsaih ani.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

BIOMETRIC ENROLMENT

Mizorama awm mek Myanmar raltlante mit-naute leh kutze-thla lak hna kal zelah raltlan awm zawng zawng zahve aia tam chhinchhiah an ni tawh.

Home department hotute hnen atanga thu dawn danin kumin July thla tawp lam atanga biometric enrolment kalpui-ah Zirtawpni thleng khan raltlan awm mek 31,621 zinga 17,864 te mit-naute leh kutze thla la a chhinchhiah an ni tawh a. Hei hi za zela 56 point 49 a tling tawh a ni. Harsatna chi hrang hrang, internet tha lo leh biometric enrolment lakkhawmna hmanrua a harsatna a awm chungin he hna hi kalpui chhoh zel a ni a. He hna thawh zawh hun atan hian hun bi tiam a awm chiah lo niin home department hotute chuan an sawi a ni. Mizorama Myanmar

raltlan awm zat hi a pangngai reng lova, a changin an tam a, a changin an tlem a.Hei hi chhan chu lo luh belh an awm chang a awm a, an rama kir leh emaw Mizoram pawn lama chhuak emaw an awm reng vang a nih thu an sawi.

<><><>